

COMUNICATO n. 3456 del 20/11/2025

Dai 27 de november del 2025 ai 9 de jené del 2026 se pel se enscinuèr

An de scola a la foresta te Paijes UE e Regn Unì: l é stat aproà i criteries per la conzescion di voucher

[Ladino] La Jonta provinzièla, con n provediment portà dant dal Vizepresident Achille Spinelli e da l'assessorea Francesca Gerosa, l'ha aproà n avis per la conzescion de voucher per la partezipazion a percorsc scolastics a la foresta te paijes de la Union europeèna o tel Regn Unì. Se trata de na scomenzadiva metuda a jir per i studenc e la studentes del secondo an di istituc de istruzion de la scola auta con percors scolastich de cater egn o del terzo an del percors de istruzion de scola auta che vel jir a stèr sie meisc o dut l an de scola a la foresta.

“Nosc obietif l é chel de ge dèr l met ai studenc de proèr na fona esperienza scolastica e formativa a la foresta – sotrissea l'Assessora Gerosa – che la é bensegur emportanta soraldut per la crescimonia personèla e per emparèr n lengaz forest. Con chesta scomenzadiva volon sostegnir esperienze formatives a la foresta, che les é de didament per formèr i joegn da n pont de veduda internazionèl”.

“Fèr n investment te chel che se pel emparèr, smaorèr la competenzes linguistiches e la cognoschenzes di joegn, con n orientament inclusif e inovatif, l é zeche de dassen emportant per la valorisazion de la ressorses umènes e profescionèles, che pel favorir n miorament trasversèl de dut l sistem culturèl, sozièl e produtif del Trentin”: à dit ence l vizepresident Spinelli.

La scomenzadiva la ge va do a la strategia provinzièla, e soraldut al obietif che se se met dant per n temp lonch-mesan che la é outa al smaorament de la competenzes plurilinguistiches di studenc e de la studentes, colun mai che sie l orden e degré de scola, spervaji che la promozion e l stravardament de l'identità culturèla, economica e sozièla del Trentin i vegn sostegnui, se sa ben, ence tras l svilup de cognoschenzes e capacitèdes de dialogh a livel european e global, estra che col obietif de engaissèr e de sostegnir esperienze formatives a la foresta, che les é fondamentèles per la crescimonia personèla e per l svilup de competenzes che do se podarà desfrutèr tel lurier.

DESTINATÈRES

Vegn ametù a la scomenzadiva i studenc e la studentes che:

- endèna chest an de scola 2025/2026 va te la clasc seconda di percorsc de istruzion de scola auta con percors de cater egn o te la clasc terza di percorsc de istruzion de la scola auta te istituc scolastics taliegn;
- cogn amò compir 20 egn;
- i vif te la Provinzia de Trent;
- i à n domizilie te la Provinzia de Trent (l student sentadin cogn jir te n istitut scolastich tel Trentin);
- I fèsc pèrt, a livel de condizion economica, de na familia che à n indicator ICEF “Familia” che vegn fora da la declarazion di vadagnes e patrimoniè 2024, calcolà a scomenzèr dai 15 de setember del 2025, valif o più bas che 0,83.

OLÀ

An de scola te n Paisc de la Union Europeèna o tel Regn Unì.

REGNÈDA

L percors de istruzion l pel esser anuèl (amancol 240 dis) o parzièl (amancol 110 dis).

PORTÈR DANT LA DOMANES

La domana per l voucher la cognarà vegnir portèda dant, demò on line, **da en jebia ai 27 de november del 2025 da les 10:00 scin a en vender ai 09 de jené del 2026 da les 12:30**, jan sul sit www.provincia.tn.it/fse+

Chest contribut conzedù aboncont l vegn dat fora se se fenesc l an de scola 2025/2025 senza loces formatives.

La sumes metudes a la leta les à l obietif de paèr ju l cost de sojornanza endèna che l student o la studenta i é a la foresta, enveze l endrez del percors l resta a cèria del student o de la studenta e de la familia. I emporc dac su i mudarà aldò del paisc forest cernù, de la regnèda del percors (anuèl o parzièl) e del indicator ICEF “Familia”.

L Avis per la partezipazion a percorsc de studie te paijes UE o tel Regn Unì, l vegn metù a jir tel chèder del Program FSE+ 2021-2027 de la Provincia Autonoma de Trent, con n cofinanziamet per l 40% da l'Union europeèna/Fondo sozièl european plus, per l 42% dal Stat e per l 18% che resta da la Provincia Autonoma de Trent.

L emport complessif a la leta de 600.000,00 euro l permetarà de finanzièr presciapech sessantacinch voucher.

Per informazions se pel tor contat con:

Struttura Multifunzionale Territoriale Ad Personam

Via Pranzelores, 69 – 38121 Trent

Dal lunesc al vender da les 8:30 a les 17:30

Numer vert: 800 163 870 – fax 0461 390707

web: www.provincia.tn.it/fse+

Traduzion di Servijes Linguistics e Culturèi del Comun general de Fascia

(cdt)